

संत रामसनेही दास



संत रामसनेही दास के जनम औरंगाबाद के भरकुंडा नाम के गाँव में भेल हल। इनकर पद में हठयोग के तत्व के उल्लेख मिलऽ हे। ई कबीर के बतावल मार्ग पर साधना करऽ हलन। ई निरगुन पंथी हलन। निरच्छर होला पर भी नया-नया पद बनावऽ हलन। ई भक्तिकालीन कवि हलन। इनकर दू-तीन पद परकास में आयल जेकरा से इनकर साधना के मरम जाने में कुछ सहायता मिलऽ हे।

मगही पढ़ेवाला छात्र के भक्तिकालीन कवि से परिचय कराना जरूरी हे। ई पाठ में हठयोग आउ रहस्यवाद के झलकी मिलऽ हे। सूरति, निरति, गंगा, जमुना, इंगला, पिंगला, सुखमन आदि के परयोग मिलऽ हे जेकर अर्थ प्रतीकात्मक होवऽ हे।

कवि के जीवन में साधना न करे के अफसोस हे। अब तो उनकर जीवन के अन्तिम समय आ गेल हे। एही से ऊ कह रहलन हे कि सूरत परम ब्रह्म परमेस्वर से नेह न लगयलन जेकर उनका बहुत अफसोस हे।

चले के बेरा कछु जनली न गे सजनी

चले के बेरा कछु जनली न गे सजनी,
सूरत से नेह न लगउली गे सजनी।

दिन-रात खाइ के अचेत रहली सजनी,
चढ़त जवानी मस्तानी में बितउली।

देख के बुढ़ारी रोआइ आवे सजनी,
सूरत से नेह न लगउली गे सजनी।

सूरत से नेह न लगउली गे सजनी,
एही रे देहिया में सिवजी बसल हथ ।

गंगा आ जुमना के धार बहै सजनी,
सूरत से नेह न लगउली गे सजनी ।

कहत सनेही राम संतन के दास हथ,
सूरत से नेह न लगउली गे सजनी ।

अभ्यास-प्रश्न

मौखिक :

1. (क) निरगुन पंथ का हे ?
(ख) रामसनेही दास कउन काल के कवि हलन ?
(ग) रहस्यवाद का हे ?
(घ) सूरत के माने इहाँ का हे ?
(ङ) बुढ़ारी देख के कवि के रोआइ काहे अयलक ?

लिखित :

1. (क) संत रामसेनही दास के परिचय दऽ ?
(ख) 'चले के बेरा' से का समझऽ हऽ ?
(ग) अचेत रहे के का भाव हे ?
(घ) सूरत से नेह कवि काहे न लगउलक ?
(ङ) 'सजनी' के का अर्थ हे ? कवि ई सबद के बार-बार परयोग काहे कइलक हे ?

2. नीचे लिखल पद के व्याख्या करऽ :

दिन-रात खाइ के अचेत रहली सजनी,
चढ़त जवानी मस्तानी में बितउली ।

देख के बुढ़ारी रोआइ आवे सजनी,
सूरत से नेह न लगउली गो सजनी ।

3. भावार्थ लिखऽ :

एही रे देहिया में सिवजी बसल हथ,
गंगा आ जमुना के धार बहे सजनी ।

भासा-अध्ययन :

1. नीचे कविता के कुछ पंक्ति देल गेल हे जेकरा में छूटल पंक्ति के लिखऽ :

सूरत से नेह न
..... बसल हथ

2. नीचे लिखल मुहावरा के अर्थ बतावऽ :

(क) धार बहना

(ख) अचेत रहना

(ग) बुढ़ारी में रोना

(घ) नेह न लगाना

3. नीचे लिखल पद के सिल्प-सौन्दर्य बतावऽ ।

दिन-रात खाइ के अचेत रहली सजनी,
चढ़ल जवानी मस्तानी में बितउली ।
देख के बुढ़ारी रोआइ आवे सजनी,
सूरत से नेह न लगउली गो सजनी ।

योग्यता-विस्तार :

1. ई पद के भाव से मिलइत कोई अन्य संत कवि के पद के चार पंक्ति लिखऽ ।

2. पाठ के अन्तिम दू पंक्ति में इस्तेमाल होयल अलंकार के नाम बतावऽ ।

(क) स्लेस (ख) अनुप्रास (ग) उत्प्रेक्षा ।

3. गंगा-जमुना केकर प्रतीक हे ?

4. पाठ से दू गो सहचर सबद बतावऽ ।

5. नीचे लिखल सबद के विपरीतार्थक सबद बतावऽ ।

(क) संत (ख) जवानी (ग) दास (घ) अचेत ।

6. संत रामसनेही दास के पद के अघार पर आतमा, परमात्मा के बीच सम्बन्ध बतलवऽ ।

7. कवि के विचार से तू कहाँ तक सहमत हऽ ?

सब्दार्थ :

कछु	—	कुछ
बेरा	—	समय
सजनी	—	आत्मा के प्रतीक
सूरत	—	परमात्मा
नेह	—	परेम
लगउली	—	लगा लेली
दिन-रात	—	हर समय
अचेत	—	बेखबर
जवानी	—	जुवा अवस्था
बुढ़ारी	—	जिनगी के चौथापन
बितउली	—	बिता-लेली
रोआइ	—	रोना
देह	—	सरीर
सिवजी	—	कल्याणकारी (हिन्दू के एगो देवता)

